



STINAPA TA INFORMA

DAMA MUSIKAL SU MEDITASHON

E dama aki ta sèmper okupá ku su dos yunan, su kompañero, su trabou na departamentu di 'Voorlichting' di gobièrnu i mil un kos. Lokual hopi hende no sa ta ku e ta un maestra riba kitara di bas. Otro 'sekretu' ta ku e tabata un artista na Hulanda den bandanan karibeño/antiano konosí manera Ayakamata, Guadiriquiri i Eurocaribeñas. E último aki tabata un banda di puramente hende muhé. Pero debí na falta di un trompetista femenino a kontratá su aktual kompañero. "Si bo para ketu i pensa, ta masha tiki pais a logra mantené nan naturalesa", Jeanne ta kuminsá na splika su orguyo pa naturalesa boneriano. E ta di opinion ku Boneiru su eko-turismo ta Boneiru su atrakshon prinsipal. Otro lugánan, asta islanan den besindario, tin edifisionan high-rise so. Bunitesa di e naturalesa boneriano tabata un di e faktornan prinsipal ku a buta Jeanne bin biba na Boneiru despues di regreso fo'i Hulanda. Ounke e ta yu di bonerianonan, el a nase i lanta na Kòrsou. "I mi ta haña e bunitesa aki hustamente na Rincon, kaminda mi ta biba", Jeanne ta bisa ku firmesa. Su sitionan mashá gustá ta entre otro Altamira Uño, kaminda ku e gusta kana ku su yunan. Otro sitionan ta Seru Para Mira, Gròt di Lourdes i Gotomeer. E ta konsiderá Gotomeer berdaderamente un lugá pa meditá. Mientras ku tur e otro lugánan menshoná e por djis bai sinta, relahá i pensa bai leu. Ya ku Boneiru no tin materia prima pa nos prosesá i bende, nos entrada ta dependé di turismo. Pa nos por kompetí ku otro pais i islanan nos mester di algu pa destaká. I esaki ta pues nos naturalesa i nos eko-turismo. Mayoria hende ta skohe un fakansi pa relahá i nos naturalesa ta ofresé esei. Jeanne ta masha konsiente ku un gran parti di su salario tambe ta dependé di entrada di turismo ya ku ta via entrada di turismo (i tur e impuestonan ku nan ta paga pa yena kaha i tur gastunan ku nan ta hasi pa yuda ekonomia lora) ta pagu'é. Tin hende tin difikultat ku organisashonnan di konservashon ya ku nan no ta komprondé. Por ehèmpel ora di protehá turtuga i karko. Ta hustamente ta protehá nan pa no tin ekstinkshon i pa nan rekobrá forsa. "No tuma nos naturalesa komo algu di mes, manera ku e t'ei pa sèmper, nos tin ku sigui traha duru pa manten'é", Jeanne ta terminá. *Skirbí pa Natalie Wanga, tradusí pa Marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALES



Traha huntu na un desaroyo duradero pa Boneiru